

Xapa kememite'u'utiiyarie Hepirayutsixi

Kakaiyari pitatiutaxatia nu'aya yatikuxatakaku

¹ Kakaiyari, meripaiti katiniwakux-axatiwakaitini tapaapama, Kakaiyari niukametemama yametekuxatakaku, yuxexuiti kememite'upitiiyarie niuki yiki mi'anene hepaitsita.

² Hiki tukari taparirimekaku pitatiutaxatia tame, kemi'ane nu'aya mihiki pita yatikux-atakaku. Miki yuniwe kaniukayeni hetsiena mitinakeniki naiti, miki hetsie Kakaiyari tita 'amitikuma katiniunetiani.

³ Miki hetsie Kakaiyari kemitixawati kanimatsiikini meta kemitimariwe, Kakaiyari kani'iniariyatini kaniyuritini. Naime meta piratiki yuniuki mitirikaiyeki, miki yikimana 'aixia 'iyurieka tita 'axatemite'uyuri hepaitsita mitatsi'itieniki, 'ana kemi'ane mimariwe tserieta kanayerini muyuawitsie.

Nu'aya pumariwe, niuki tuayamete taheima miemete hepaina mekamamariwawekaku

⁴ Miki kaniupitiiarieni yemeki mimariwaniki kemi'ane mihiki, peru taheima miemete niuki tuayamete hepaina mepikate'upitiiyarie, yaxei kiata mariweti kanayani, miki hepaina mekamamariwawekaku.

⁵ ¿Kakaiyari kemi'ane mipai pitiutahawixi niuki tuayamete xeime heiwa:
«'Eki pepineniwe,

hikiri nekamaniutinuiwitiani»,
'utaiti, nutsu keru 'utayi:

«Ne 'ukiyarieya nepayani,
miki neniwe payani?»

6 Matsi tukari hepaitisita tikuxatati kepauka
kwiepa mi'atiani yumatari mipai pita kanaineni:
«Yunaiti Kakaiyari hetsia miemete niuki
tuayamete meke'eyexeyani».

7 Niuki tuayamete wahepaitisita mipai paine:
«Yuniuki tuayamete 'eka kaniwarayeitiwani,
te'i'uximayatsiriwamete meta tai nerikwari
kaniwarayeitiwani».

8 Yuniwe pita xatati mipai paine:
«'Eki, Kakaiyari, 'a'uweni hakewa pemira'aita
yuheyemeki 'apuwe,
kanixeuraiyeni 'a'itsi pemakwe'e
pemit'i'aitameki 'iniari kanihikitini
heitseriemeki kepemitikamie 'eki».

9 Pepinaki'erie tita mitiheitserie, pepi'uxiwe'erie
tita 'aitsika mitititsana,
Kakaiyari 'aku kemi'ane mi'akakaiyari
pimatsi'anayexei, temawierika metsipitiati,
'iniaritime 'ahamikuma kawaranayex-
eiya».

10 Mipai paineta:
«'Eki, Ti'aitame, tsutiapai kwie pepukama,
muyuawi peputawewi 'amamaki».

11 Miki pukumawere, 'eki pita 'apeniuwemiki.
'Ixuriki hepai miki naiti kanitaye'irimiki.

12 Muyuawi pepitatuna 'ikari hepai,
kamixa hepai pipatsieni,
matsi 'eki yaxeikia pe'aneti pepi'ahayewa,
'atukari pikatixini».

13 ¿Keri hatsuaku titahiawiwe niuki tuayamete
xeime mipai tikihiaweti:

«Netserieta kenayexi,
ne nekaniwaka'unamiki memimetsi'aye'unie,
'ahixie nekaniwa'atiamiki»?

14 ¿Kamitsi niuki tuayamete yu-
naiti 'iyarite mekatehiki, Kakaiyari
memite'uximayatsiriwamete, memitani'ariwa
memiwaparewieniki kemi'ane wahetsie
mitinakirime memitawikweitsitarieniki?

2

'Tki wikweitsitarika waikawa pitirikaiye

1 Mipai mi'aneki, 'ayumieme kaneuyeweka
matsi waikawa teme'eriwaniki tita temite'u'eni
kapa yaki xeikia teyiati 'ateewa te'u'uwaniki.

2 Kami miki niuki mutaxatsie niuki tuayamete
taheima miemete yametekuxatakaku, miki
kaniyuritikaitini, yunaiti memititsanaxia meta
yunaiti memika'i'eniekai mekatenskapitarieni,
wahetsie kemitinakekai, kemireuyewekai.

3 ¿Merikite, xika mipai 'aneni, ketsi
tetetawikweni tame xika te'itawe'erieka 'iki
wikweitsitarika miya mititirikaiye? Miki
kaniutsutitarieni Ti'aitame yatikuxatakaku
ketemitetawikweitsitarieni haiti, niukieya
meputseiriyaxi mikita memi'eniekai mipai
temitemaikaki tame.

4 Kakaiyari meta 'axeikia wahamatia
mipai katinihekiatakaitini 'iniari wewieti
mamariwaweme, tirikaiyemeki tiyurieneti
miiremeki, 'Iyari Mitiyupata yatiwapitiakaku
yuxexuime, kemitinakekai Kakaiyari.

Kemi'ane mitsutia temitawikweitsitiarieniki

⁵ Kemitu'aitaxi miki kwie 'umamie hepaitsita, niuki tuayamete memite'aitaniki muwa 'atsipika'utayi, miki kwie kanihikitini tita hepaitsita temitekuxata.

⁶ Hekiatsika kanixuaweni xapatsie mipai manuyine:

«¿Teiteri ketita metehiki pemiwara'eriwaniki?

¿Teiteri waniwema ketita metehiki pemi'awairiki wahetsiemieme?

⁷ Pekaniwarukayatsa niuki tuayamete wahepai memikarikawiniki, kuruna pekaniwaranutimanirieni witsime'aneneti memakineki 'aixia memitexeyariekaki,

⁸ naime pepitietuiri mitiwata'aitaniki, xika Kakaiyari naime hetiana titipini».

Merikitsi, tixaiti pikaranuyuhayewa hetsiena mikati'aitaniki. Peru hiki 'akuxi ketemitewaxeiya teiteri, naiti 'akuxi pikaha'iwariewe miki miti'aitaniki.

⁹ Ketsutsi xeikia ketemite'ixeiya, miki yapaimexia kaniukayerieni niuki tuayamete wahepai mikarikaiyeniki, miki mitiukwinixiki kepauka mumi, kananutikurunatiarieni witsi'aneti mayaniki meta 'aixia mitixeyariekaki. Kakaiyari 'aixia mitiuka'iyariki mipai katiniuyini, muminiki tanaime tahetsiemieme.

¹⁰ Miki naime katiniutsutiani, 'inetiaku katiniuneni naiti, 'aixia katiniuyurieni Kakaiyari, warawititi yumireme yuniwema witsime'aneneti memakineki, meye'atiaki kemi'ane mitsutia memitawikweitsitiarieniki, yatipitiatit mitikwineki para maye'aniki.

11 Kemi'ane miwapata, meta memupatsie, xeimetsie mekaniyekine yunaiti, 'ayumieme pikayutewiya yu'iwama tiwaruteriwati

12 mipai 'utaiti:

«Ne'iwama nepitiwataxatiani kepemitiuka'iyari, 'ahetsia miemete memayuxeirie wahixiapa ne'uweti nepimetsitaniawa».

13 Mipai paine meta:

«Ne yuri nepiti'erieka hetsiena».

Mipai meta paine:

«'Ena xepinetsixeiya, neniwema Kakaiyari minetsiyetui».

14 Merikitsi, raniwema 'axeikia mekaniyuxewini xeixuriyayari meta xeiwaiyari mehitititi, 'ayumieme mikita yaxeikia tahamatia yuxewiti kanayani, tahepai yemeki, mipai mitiuyuriki mumiki meta piyiwekai mika'unaniki kemi'ane tirikariya mexeiya yemeki mitatsikwiniki Kauyumarietiti.

15 Piyiwekai meta miwaxinaki miki mexi me'ayenenierikai meuyewekai wairiyarika memite'uximayakaki mehe'eriwati kememitekwinekekai.

16 Kanimatsiikini niuki tuayamete miwaparewieniki pikanua, matsi 'Apirahami xiiyarimama pita miwaparewieniki.

17 'Ayumieme peuyewekai yu'iwama wahepai 'aneti mayeitiarieniki naime hepaitsita, mipai 'aneti kaniyiwekaitini mawari wewiwamete tiwa'aitiwame mayaniki yatikamieti meta tiyukanenimayati, Kakaiyaritsie mieme hiritiarieti, 'itiya miwewieniki tita teiteri 'axamemite'uyuri hepaitsita.

18 Miki mītiukwinixiki mu'iniatsieki, kaniyiweni miwaparewieniki hipame mexi me'iniatsie.

3

Ketsutsi pīmariwe, Muitsexi hepaina kamariwekaku

¹ Merikite, ne'iwama xemupatsie Kakaiyaritsie mieme, 'axeikia xemuta'inierie kemi'ane taheima makawe xehahiawekaku, mipai mi'aneki 'ayumieme mipai nepaine, xekena'eriwani Ketsutsi, miki ni'ariekame kanayani meta mawari wewiwamete tiwa'aitiwame kwinimieme mitiuhiritiariē, miki kanihikitini hetsiena tetewiyati temitahekiata.

² Miki yakatinikamieni kemaine kemi'ane mihiritia, yaxeikia kemitikamiekai Muitsexi, Kakaiyari kie kiekatari wahepaitsita hiritiarieti.

³ Peru 'ikitsie pitiunakixi matsi yemeki mariwemeki mixeyarieniki, Muitsexi hepaina katixeyariewekaku, yaxeikia kii wewiwame waikawa mariweti kemitikuxaxatsiwa, wewiyaya hepaina katikuxaxatsiwakaku.

⁴ Kii naiti tewi pitiwewiyaya, peru kemi'ane tinaieme mitiutiwewi, miki Kakaiyari kanihikitini.

⁵ Merikitsi, Muitsexi yapitikamiekai Kakaiyari kie kiekatari yunaieme wahepaitsita kemitiuhiritiariē, peru tiparewiwame kanihikitikaitini xeikia mukayerie mitihekianiki tita 'arike mitikuxaxatsiwanikekai hepaitisita.

⁶ Kiritsitu pita yapitikamie kiekame nu'aya hikititi, Kakaiyari kiya hepaitisita kemitiuhiritiariē. Merikitsi tame kii tepihiki xika tetahayewa tekamamati 'aixia te'utiyuati tita temitekwewie

ketemite'uta'eri, tekakuyuitiariwati kepauka
mitapareke,

¹⁵ mipai kemanuyine:

«Hiki xika xe'i'enieni 'utaniukakaku,
yu'iyari xepikatse'iriyani

kememite'aki miki 'ana kepauka
memiyukwitiwekai nehamatia».

¹⁶ ¿Kehate mepiyukwitiwekai hamatiana
tsepa memi'eniekai? Miki mekanihikitikaitini
yunaiti 'Ekipitu kwieyaritsie memeyeki Muitsexi
warawitikikaku.

¹⁷ ¿Merikite, kehate wahepaitsita piha'akai huta
teuiyari wiyari? Miki mekanihikitikaitini 'ax-
amemite'uyuri 'ana, miki wakaxari makumawet-
sie puyuhayewaxi me'ukwiku.

¹⁸ ¿Merikite, kehate tiwarahiaweti puyuhiritia,
mipai 'utaiti kename meka'aye'axianiekai
yemeki hakewa miwareka'uxipietianiekai? Miki
mekanihikitikaitini yuri memikate'eriekai.

¹⁹ Merikite 'ayumieme mipai tepitemate,
mepuyutatexi me'aye'axianike yuri
memikate'eriekaiki miki.

4

Kakaiyari teiterimama wa'uxipiya

¹ Merikitsi niukieya puxuawe 'akuxi kemutayi
kename tewi yiwe maye'aniki hakewa
meika'uxipitiani, 'ayumieme tekemamaka kapa
xewiti xeme ka'aye'aweme hepai tixeyariekai.

² Tametsieti niuki 'aixia manuyineki
tepitemate'utaxatarie yaxeikia miki wahepai,
peru miki niuki memu'eni 'atsipikawaruyuri,

memikayutaxewiriyaxiki miki memi'eniekai wahamatia yuri memikate'uta'eriki.

³ Tame pita yuri temite'uta'eri tepaye'axiaxime hakewa mitatsiheka'uxipitiani, mipai kemutayi:

«Hiki neha'ati, mipai neputayi:

“Hatsuaku nehetsia mepikaye'axiani

hakewa nemiwareka'uxipitiani kekaitsie”».

Mipai putayi tsepaneti 'uximayatsikaya miniriekai kwie munetiarietsie paiti,

⁴ xapatsie niuki puxuawe miki 'atahutarieka mieme tukari mixata mipai 'anuyiti: «Kakaiyari 'atahutarieka tukaritsie kaniuka'uxipieni 'inika yu'uximayatsika naime».

⁵ Mipai paine meta: «Yemeki mepika'aye'axiani miki hakewa nemiwareka'uxipitiani tsie».

⁶ Merikitsi 'uxipiya 'akuxi puxuawe hipati yamemite'aye'axianiki, peru miki matiari niuki 'aixia manuyineki mipai memitekihiawariwakai mepika'aye'axia yuri memikate'eriekaiki.

⁷ Tawarita xeime tukari kaniupata: «Hiki miteriwarie», Rawiri xapayatsie mipai putayi miixa wiyari 'anuyeyaku, yaxeikia meripai kemutayi mipai 'utaiti:

«Xika xeme hiki niukieya xe'i'enieni,
yu'iyari xepikatse'iriyani».

⁸ Xika miki Kutsuhexi wareka'uxipitiani ke 'ana, Kakaiyari 'atsipikahainenikeyu xeime tukari hepaitsita 'arika maye'anikekaiki.

⁹ 'Ayumieme 'uxipiya tukari puxuawe 'akuxi Kakaiyari teiterimama wahetsiemieme.

¹⁰ Kemi'ane maye'a hakewa meika'uxipitia, miki pu'uxipie yu'uximayatsika 'unika, yaxeikia

Kakaiyari kemitiuka'uxipi yu'uximayatsika 'unika.

¹¹ 'Ayumieme teketamexitiaka temaye'axianiki hakewa mitatsiheka'uxipitiani, xewiti kapa 'atiweniki kapa matsiikiniki hetsiena yuri kemikati'erie yaxeikia miki wahepai.

¹² Kakaiyari niukieya payeniere meta pitirikaiye, 'aixia pireutikekema, hepaina kareutikekemakaku 'ixipara tsepa naitsata meutixikakauni. Pitixiteke 'ipatat ratukari meta ra'iyari, raturuyari meta ratutanayari naime, pi'iniata tewi kemitiyumate kemitiyu'iyaritia yu'iyaritsie.

¹³ Tsepa kemitiitita munetiarie pikayiwe mi'awietsiekaki miki kemitixeiya, naitiri matsi pimatsiiki panutiyepiya kemi'ane mitatsitahiawe 'ixeiyakaku.

Ketsutsi mawari wewiwamete tiwa'aitiwame kanihikitini kwi mihiritiarie mimariwe

¹⁴ Merikitsi tepeixeiya mawari wewiwamete tiwa'aitiwame kwinimieme mihiritiarie mimariwe muyuawi heima manutitia Ketsutsititi Kakaiyari minu'aya, 'ayumieme tekeyuhayewani yatetetahekiatati hetsiena ketemitewiya.

¹⁵ Mawari wewiwamete tiwa'aitiwame ketemite'ayexeiya, tepikaheixeiya kemi'ane mikayiwe tahepai mitiyumaikaki ketemitewerarani tame, tepeixeiya pita kemi'ane naime hepaitita mu'iniatsie yaxeikia tahepai, peru 'axakatiyuriweti.

¹⁶ 'Ayumieme tekamamati 'ahurawa teke'akine kemi'ane 'aixia mitiuka'iyari 'uweniyea manuwe 'aurie, teminenimayatsiekaki, temiparewiyaniki

kepauka mipai temiteheuyehiwa, miki 'aixia tiuka'iyarikaku.

5

¹ Mawari wewiwamete tewa'aitiwamete teiteri watsata mekananuyexexeiyariwani yunaiti, mekanukayatsarieni Kakaiyari hetsiemieme memihiritiariiekaki, teiteri wahetsiemieme memixatianiki 'imikieri mawariyari, meta mawarite tita 'axamemiteyurie hepaitsita.

² Kaniyiweni 'atsimemikatemate meta memeuyexiriwe wanenimayati miwatahiaweki, mikita weraniti 'amuyeikaki wahapai.

³ Mipai mi'aneki 'ayumieme kaneuyeweka mawari Kakaiyari mixatianiki teiteri tita 'axamemiteyurie hepaitsita, mipaita pireuyewetse mawari miwewieniki yikimana tita 'axamitiuyuri hepaitsita 'aixia miyurieniki.

⁴ Miki meta, tewi yikimana pika'uyukaye 'ipai mitihiritiariiekaki, matsi Kakaiyari yarenayexeyaku xeikia pukayerie 'Aruni hepai.

⁵ Yaxeikiata Kiritsitu witsi'aneti pika'ayuyeitia yikimana mawari wewiwamete tiwa'aitiwame mayaniki, matsitsi mipai pitipitia kemi'ane mipai mititahiawixi:

«'Eki pepineniwe.

Hikiri nekamaniutinuiwitiani».

⁶ Kemaine xeime xapatsieta:

«'Eki mawari wewiwame pekanihikitini yuheye-meki mieme,

Merikitsereki hepai».

⁷ Kiritsitu mexi tewititi 'a'uyeikakai karima kaniyutanenewieni hahiwati 'utatsuati, kanitawawirieni kemi'ane miyiwekai

mitawikweitsitianiki kapa 'uminiki, pu'enierie
Kakaiyari mariweme mayeitiaki.

⁸ Tsepa nu'aya mihikitikai, tiukwineka
yapiretima yamitikamieniki,

⁹ mipai raye'atariieka, yuheyemeki
memitawikweitsitiarieniki wapitiati kanayani,
yunaiti yamemitekahu kemaine,

¹⁰ Kakaiyari kanenayexeiya mawari
wewiwamete tiwa'aitiwame mayaniki
Merikitsereki kemitiuhiritiariie hepai.

*Kemitiwaku'imaiyakai memikatehayewaniki
yuri mete'eriet*

¹¹ Miki Merikitsereki hepaitsita
waikawame niuki mikwaniwe tepeix-
eiya yatemitexehikiatsitiiyaniki, xeme
xemiyu'iraraxieki kexemite'u'enana.

¹² Kamitsi, mipai pireuyewetse matsi
te'ikitamete xemihikitiniki, miixa manuyetiakiri
yuri xemite'uta'eri, peru xekaneiyehiaka
kemi'ane hutarieka mitsutiani tixe'ikitiati
tsutiapai mieme 'ikitsika Kakaiyari kemaine,
hekawamete kememite'ikitiarie. Retsi
xeheuyehiati xekanakine, 'ikwai mitirikaiye
xekemati xepika'akiniwawe.

¹³ Yunaiti retsi memitsitse mepika'iyamatika
niuki miheitserie hepaitsita, mepitiri 'akuxi.

¹⁴ 'Ikwai mitirikaiye 'amemuyumate wahetsie
kanimiemetini, miki memi'iyamatikaki
yu'iyaritsie memiteyi'ikitiawaweki para
memipataniki tita 'aixia miti'ane tita 'axamiti'ane,
miki wahetsie pimieme.

6

¹ Merikitsi peuyewetse temitehayewaniki hiki tetekuxatati tsutia mieme niuki hepaitsita Kiritsitu hepaitsita manuyine xeikia, tepuhuni pita temaye'axianiki. Tawari tenari tepikatawewieni kitia mieme, mipai tepikatekuxatani kemireuyewetse tewi mitihayewaniki kemitiyurienekai kimana miminiekai, kemireuyewetse yuri mitita'erieniki Kakaiyari hetsie.

² Mipai tepikate'ikitani hiki 'iyarika hepaitsita, tewitsie kememite'utimeme hepaitsita, mikite kememite'anuku'uni hepaitsita, yuheyemeki 'itsikame kemitiwaranutaxirieni hepaitsita.

³ Merikite, temaye'axianiki tepuhuni, xika Kakaiyari mipai tatitaunieka.

⁴ Miki heiwamieme memuhekiariyarie, yuhetsiemieme memeitima miki 'imikieri taheima mimieme, 'Iyari Mitiyupata mehexeiyati memaki 'axeikia tahepai,

⁵ yikimana mipai memitehetima 'aixia kemiti'ane Kakaiyari niukieyatsie meta tirikariya memetima tukari 'umamietsie mieme,

⁶ miki xika mete'uhayewa 'axake-memiteyuriekai, mepikayiawawe tawari memihewariyarieniki para memitehayewaniki kememiteyuriekai. Miki matsi kuruxitsie mepimi Kakaiyari nu'aya yikimana, matsikime mepeyeitiwa minanaimarieniki.

⁷ Kamitsi, kwie xika wiyeri yatihareka hetsiena mukawiwiye, xika 'itinetiani tupiriya 'aixia mi'anene 'etsamete wahetsiemieme, Kakaiyari 'aixia pitipitia.

⁸ Mexika kwie xika xuya witsaxa 'utinetiani pɪxani'eriwa pita, pɪkweriwa'ane hepaitsitana mitikuxaxatsiwaniki para 'axami'itiarieniki, mitataiyarieniki pi'ayumieme xeikia.

⁹ Perutsi tsepa mipai temaitika, matsi 'aixia 'anemeki kename xeteyurie yuri tepite'erie xehepaitsita tanaki'erima, kename xetawikweitsitariexime.

¹⁰ Kakaiyariri mipai pikayiane kemi'ane heit-seriemeki yamikatikamie hepai, pikaxetimaiya kexemite'uximayakai kexemiteyuhekiatakai xeteyukanaki'erieti xeme'eriwakaiki, kexemiteyukanaki'eriekai pimatsiikikai xemiwaparewiekaiki teiterimama, hikita kexemitewaparewie.

¹¹ Mipai pitatinake, yuxexuiti xeme xemiyuhekiataniki yaxeikia xeyumexiitiati yemeki yuri kexemite'erie, xeta'ikwewati kepauka mitapareke.

¹² Peuyewetse xemikayu'iraraxiekaki, matsi peuyewetse xemiwa'ikeniki miki yuri mete'eriekaku 'emeteutewikaku mekawairipieti, miki wahetsie mitinakirime tita memitehahawariwakai kename meheix-eiyaniekai.

Kemitiyuritikai Kakaiyari kemitiwarutahiawekai

¹³ Kakaiyari kepauka mipai 'Apirahami mitiutahiawixi tita mirexeiyaniekai hepaitsita, xewiti matsi waikawa mitirikaiyekai 'apika'uyeikakai Kakaiyari mixataniki yihiritiati, 'ayumieme yuxatati yikimana puyihiritia mipai 'utaiti:

14 «Yemeki 'aixia nekameniyuriekamiki, 'anui-warima yumiireme nekaniwarayeitiamiki».

15 Mipai 'ereutereka ta'ikwewati kawairipieti 'Apirahami, kemitiutahiawarie, heixeiyati kanayani.

16 Teiteri kepauka memiyihiritia, mepixata kemi'ane matsi waikawa mitirikaiye, naimeki xika yuhiritiani, mikiki pitseiriyarie niuki, mikiki pinirie niuki xiatiarika.

17 'Ayumieme Kakaiyari yaxeikia pituuyuri kepauka muyuwairi matsi heitseriemeki miwahekiatsitiyaniki miki wahetsie mitinakenikekai tita memitehahiawaruwakai, mipai memitemaikaki kemikatipatsiewe tita mitiyuriemiki, 'ayumieme pitaxewiriyaxi yuniuki yihiritiati.

18 Tame 'ayumieme tita mikatipatsiewe tepex-eiya hutame, miki hepaitsita Kakaiyari pikayiwe mitati'itaiyaniki, mikiki 'ayumieme tirikaiyemeki tekanituikarieka, tame temitata'unaxi te'iwiyati tita temitekwewie.

19 Mipai xika teteta'ikwewani yuri tete'erieteti, tepeixeiya tiyuhaname tatukaritsie mieme mitatsitseiriyani, pikahateke pitse'i, Kakaiyari manuwetsie pitiwiya, tukieyatsie mieme 'ixuriki reunakame warie peutahawe,

20 hakewa tahetsiemieme meutaha Ketsutsi tatsi'anuyehaitiyati, mawari wewiwamete tiwa'aitiwame 'ayaka yuheyemeki, Merikitsereki hepai mitiuhiritiari.

Merikitsereki kemitiuhiritiarié mawari wewi-wametiti

¹ Miki Merikitsereki, tsaremetari pitiwa'aitiwametikai, Kakaiyari 'Amutewi mawari wewiwameya pihikitikai. Kepauka 'Apirahami 'akunuaku te'aitamete wara'iwaka, miki manukunakixi, 'aixia putayi hepaitsitana para 'aixia mi'itiarieniki.

² Miki 'Apirahami tita mitiwarunawairi naimet-sie mieme yapaimeme tamamatatsie mieme xeime pitimi. Merikitsereki taniukiki «ti'aitame heitseriemeki yamitikamie» kananuyiyeni, «tsaremetari tiwa'aitiwame» kananuyineni meta, «ti'aitame 'aixia memiteyuxeianiki mitiwapitia» kananuyineni.

³ Yupaapa yumaama yumarema pikawarexeiya, pumawe niuki kemititsutia 'ayeniereti, kemitiutixi tukarieya hepaitsita, Kakaiyari nu'aya hepai kani'aneni, mawari wewiwame hikititi 'akaniuweni katihayewati yuheyemeki.

⁴ Merikite, xekena'eriwani mawari wewiwame kemitihiikitikai miki, 'atsita kemi'ane mitatutsitikai 'Apirahamititi tamamatatsie timieme xeime pitimi tita kuyaxi mitiwarunawairitsie timieme.

⁵ Merikitsi, hipati Rewi xiyyarimama mawari wewiwameki memihiritiarié, miki 'aitiarika mekanexeiyani tamamatatsie mieme xeime memiwawawiriekaki teiteri yu'iwama 'iniari niukiyari kemaine, tsepa mikita yu'iwama wahepai 'Apirahami hetsie memiyeki yunaiti.

⁶ Merikitsereki matsi 'atsipikatiwamaretikai, peru 'Apirahami tamamatatsie mieme xeime

pītimi, mīkita 'aixia putayi hepaitsitana para 'aixia mī'itiarieniki, kemi'ane mītiutahiawarie tita mītipitiarienikekai, miki hepaitsita mīpai putayi.

⁷ Niuki pīkayu'uxinia, kemi'ane matsi mītirikaiye kanihikitini 'aixia maine kemi'ane hepaina mīkatirikaiye hepaitsita, miki 'aixia mī'itiarieniki.

⁸ Miki meta, 'iki teiteri memīkwiwawe mēpitanaki'eri tamamatatsie mieme xeime, miki pita mīpai xeikia pītihekiatsie kename 'ayeniēre.

⁹ Pīyīwe mīpai mītayini, Rewi xīiyarimama kemi'ane hiki tamamatatsie mieme xeime memiki'īitiariwa, mīkita yakatinayukatuani 'Apirahami hetsiemie.

¹⁰ Rewi yupaapatsie pīkayeyeiwekai 'akuxi kepauka Merikitsereki menunakixi.

Ketsutsi, Merikitsereki hepai mī'ane

¹¹ Merikitsi teiteri 'iniari niukiyari memupitīarie Rewi xīiyarimama mawari wewiwamete memihikitikai, xika tewi yīwenike maye'aniki mawari wewiwamete mehikitikaku miki, ǂtitayari reuyewekakeyu xewiti mawari wewiwame yiki 'aneti manukukeniki Merikitsereki hepai tihiritiarieti, 'Aruni hepai katihiritiarieti mītahīawarieniki?

¹² Mawari wewiwamete wa'iniari xika 'upatsieni, peuyewetseta 'iniari niukiyari mīpatsieniki.

¹³ Kemi'ane hepaitsita mīpai mītikuniuwa, miki xeime nuiwaritsie kanimiemetikaitini, miki nuiwaritsie mieme xewiti mawari pīkawewiwe hatsuaku.

¹⁴ Kanimatsiikini Tati'aitiwame Kuratsie mīyētiaki, tsepa miki nuiwari hepaitsita

Muitsexi 'atsimikahainekai kename memawari wewiwametetinikeyu.

¹⁵ Miki meta, matsi 'akuxi mipai katinimatsiikini xika mawari wewiwame 'anukukeni yiki mi'ane Merikitsereki hepai 'aneti.

¹⁶ Miki pika'ukerie 'iniari mipai mitiuta'aitaxiki kename raniwetiti heitserie hexeiyani, matsi pukerie mitirikaiyeki tukarieya mikaxiweki.

¹⁷ Mipai pitihekiatsie:

«'Eki mawari wewiwame pekanihikitini yuheyemeki mieme,
Merikitsereki hepai».

¹⁸ 'Aitsika meripaiti mimieme payeyeitairie miweranikaiki tixaiti mikatiyunaki'eriekaiki,

¹⁹ 'iniari niukiyari hatsuaku tewi 'aixia pika'uyuri. 'Utixani'eriwaku tepupitairie tita matsi 'aixia miti'ane mipai pita temiteta'ikwewaniki. Mipai teteta'ikwewati 'ahurawa tepakika Kakaiyari hetsia.

²⁰ Miki Kakaiyari mipai pitiyuhiritia kename xeime mawari wewiwame tehexeianikekai yiki'aneme. Hipati mawari wewiwamete mepukayatsarie Kakaiyari yakatiwahiritiakaku,

²¹ peru miki kemitiukayerie, kemi'ane mitahiawixi kaniyihiritiani mipai 'utaiti:

«Ti'aitame yaputayi kename yatikayani,
miki pikatihayewa meta pika'ipata:

“'Eki yuheyemeki pekanimawari wewiwametini”».

²² 'Ayumieme yaxeikia Ketsutsi kanitatseiriya xeime tiratu matsi mitirikaiye.

23 'Ana miemete mawari wewiwamete mekaniyumirekaitini, peru mekwikwi'iti mepikapitiariekai memiyuhayewaniki.

24 Peru Ketsutsi miki yuheyemeki 'amuyeikaki kanimawari wewiwametini, hiritiarikaya mikayupataki.

25 'Ayumieme kaniyiweni miwatawikweitsitianiki yuheyemeki miki 'ahurawa memakika Kakaiyari hetsia miki waparewiekaku, yuheyemeki 'ayeniereti piyiwe yamitiwawiriekaki wahetsiemieme.

26 'Aixia kaniuyineta temeixeiyaki mawari wewiwame mipai mi'ane. Patsieti, 'axakatiyurieneti, katsewiximarieti, 'axateyuruwamete wahamatia kayuxewiriyati, muyuawi heima hanutiyeikati.

27 Miki mawari wewiwamete tewa'aitiwamete wahapai pika'ane, pikahauyewetse tukariki mawari mitiwewieniki yuhetsiemieme meri 'axamitiuyuriki, 'ariketa teiteri 'axamemite'uyuriki. Matsi xeimieme 'aixia piyuri kepauka mawari mayuyeitia yikimana.

28 'Iniari niukiyariki mekaniukayatsarieni mawari wewiwamete tewa'aitiwamete peru memiwerarani. Miki niuki kimana muyuhiritia, 'iniari niukiyari tsepa mutaxatsie meri, mikiki pita kaniukayerieni nu'ayatiti maye'atariewe yuheyemeki 'amuwe.

8

Tiratu kemitiyetuiriyarie kemiti'atia hekwame

1 Merikitsi matsi 'akuxi kaneuyeweka yamitayiniki, mipaita mi'ane tekanexeiyani

mawari wewiwamete tiwa'aitiwame, miki mana paya muyuawitsie, hakewa mire'aita kemi'ane mimariwe, miki tserieta paya.

² Hakewa miemekī mepatsie, piti'uximaya mana, kemi'ane yuriki tuki mihikita, kemi'ane Ti'aitame mitawewi, tewi pika'itawewi, mana pita piti'uximaya miki.

³ Merikitsi yunaiti mawari wewiwamete meka-niuti'uitiarieni mawari memiyetuayaniki, 'ayumieme kaneuyeweka mikita tixaiti mirexeiyaniki mitixatianiki.

⁴ Matsi xika kwiepa 'uyeikanike, mawari wewiwame pikahikitinikēyu, 'amemu'uwaki hipati pita mawari memiwewieniki kemaine 'iniari niukiyari.

⁵ Peru miki hakewa memitehetimawa, miki pi'ike xeikia tita taheima mitimieme, peru pikahiki, 'etiriyaya hepai xeikia pi'ane, yaxeikia pi'ane hiki, kemitiutahiawarie Mui sexi kepauka mitaketianikekai 'ixuriki tukiyari, yatikihiawekaku: «Kene'akweriwayurieka pemitiwewieniki naimē yaxeikia peti'iketī 'iniari kepemitiuta'ikitīarie yemuritsie pe'uweti».

⁶ Hiki matsi Kiritsitu tiratu 'aixia mi'ane kaniyetuiriarieni kani'atiani, tiratu meripaiti mieme 'aixia mika'anekaiki hepaina. 'Ayumieme mawari wewiwame kemitihiiki, witsipitihiritiariē, meripaiti miemete witsimemikatehiritiariēkaiki hepaina, tiratuya meta niuki mitse'itsie pitiwiya, Kakaiyari tirikaiyemekī mipai mutayiki kemitiyurieni, peru meripai mieme tiratu hepaina pikatse'ikai.

⁷ Miki tiratu meripaiti mieme xika 'aixia

'anenike, xika kareuyewekake miniukimariékaki,
tawari pikahauyewekakeyu xewiti.

8 Tsiepire kaniwaniukimaka teiteri mipai
maineki:

«Kami tukari kanaye'amiki —mipai kanaineni

Ti'aitame—,

'ana tiratu mihekwa nepiwapitiani

'Ixaheri xiiyarimama

meta Kura xiiyarimama.

9 Miki tiratu wapaapama nemiwarutawewiri
hepai

pika'aneni meripaiti kenemititawewi

kepauka wamamatsie nemiwaruwiyaia

newareyewitinike 'Ekipitu kwieyaritsie,

miki netiratutsie yamepikatekahukai,

'ayumieme neta nepiwaratimaiyaxi

—mipai paine Ti'aitame—.

10 Peru mipai paineta Ti'aitame:

«Tiratu kenemitiwatawewirieni 'Ixaheri
xiiyarimama:

Miki tukari 'aye'ayu ne'iniari niukiyari

wa'eriwametsie nepiwapitiani,

meta wa'iyaritsie nekanika'utiamiki.

Ne wakakaiyari nekanihikitikamiki,

mikita neteiterima mepihikitini.

11 Pikayiweniri xewiti yuhepai tewi miti'ikitiakaki,
meta yu'iwa mipai haiti: “Ti'aitame keneti-
mati”.

Kariki yunaiti, 'etsimemuyumate meta

'amemuyumate

mekanenimatekakuni.

12 Ne nepitiwareuyehiwirieni 'axake-
memite'uyuriki,

tawari nepikaheye'erieni ke'axamemite'uyuriki».

¹³ Merikite «tiratu yiki mi'ane» xatati, meripaiti mieme putayeitia, tita mititaye'itire mitiwerani meripaiti mitimieme, miki kwiti pitaxini.

9

Tuki kwiepa mieme meta tuki taheima mieme

¹ Miki tiratu meripaiti miemetsie metewiyati, mepeixeyakai 'iniari kememite'eyexeyaniki manuyinekai, tukita mepexeyakai mipatsiekai 'ena kwiepa.

² Miki 'ixuriki tukiyarita, Muyepatsieta muwa puwekai kixeme 'uitiwame, 'akatsiya mexayari meta paa mipatsietika.

³ 'Ixuriki hutarieka meuwiekai warita, Waikawa Muyepatsie katiniuyetewakaitini.

⁴ Muwa putiwekai 'ikwa witsimu'ia mexayari huruki wewiyati, kakuni meta tiratu mi'iniariyaritikai huruki heuwetsitarieti herie. Kakunitsieta mana piyekatei huru xariyari manana payari muyemanekai, 'Aruni 'itsiya mutaxutui kakunitsie piyekateita, tete 'etsimitsuye mana piyekatei tiratuki miraye'uxakai.

⁵ Kakunitsie mepa'ukai Kakaiyari teitamete Kakaiyari xawatiriyaya mehexeiyati, miki mekani'etiriwiyakaitini 'iniari kimana mixinarieniki. Pikayiwe naimeki hiki temitekuxataniki miki hepaitisita.

⁶ Miki naiti mipai tiuniriekui, mawari wewiwamete 'ixuriki tukiyarita matiari 'ixuriki meuwieta tukariki mekaneutahakeni yametekahuti yu'uximayatsikatsie.

⁷ Peru 'ixuriki hutarieka meuwieta xeiwiyari 'aye'axekaku xeikia kaneutahakeni yuxaitame mawari wewiwamete tiwa'aitiwame, kepauka mana meutahake, xuriya 'a'iti xeikia piyiwe, pitimawa meri 'aixia miyurieniki yuhetsiemieme, 'ariketa pitimawa 'aixia mitiyurieniki teiteri wahetsiemieme 'axamemite'uyuriki 'atsimekatemaiti, 'anarike tiutimawaka mana peutahake.

⁸ 'Iyari Mitiyupata mipai katinihekiatani, huye 'akuxi pikamatsiiki tewi maye'aniki hakewa Waikawa Muyepatsieta mexi 'a'uwe miki tuki.

⁹ Miki tuki 'iniari patia, tita hiki mitimieme, miki pitihekiata, miki tuki kemi'ane, 'imikieri mawariyari yapitiuxatiariwa, tsepa mikayiwe kemi'ane mitiutimawa 'aixia muyurieniki, 'iyarieya mika'itate'aniki.

¹⁰ Kememite'ayexeiya, yamepitekahu kemitiu'aitsie rawaiyari hepaitsita, mepe'eriwa kememite'utikwa'a, kememite'utiye'e, kememiteyukananaima, kemitiuka'iwa xeikia, 'aitsika mipai miti'aita putaxatsie mexi tukari ka'aye'awekai naiti mitihekwareki.

Kiritsitu xuriyaya

¹¹ Peru Kiritsitu kaninuani, mawari wewiwamete tiwa'aitiwame hikititi, kani'atiani tita 'umiramiekai 'aixia miti'ane, tukita peutaha, peru tukieya 'aixia pi'ane matsi, paye'axe, mamaki pikawewiya ('ena kwiepa pikamieme),

¹² miki tukita kepauka meutaha, tsipuri tsikerutsixi waxuriya 'a'iti pikayianekai, yuxuriya pita 'a'iti xeimieme xeikia mana kaneutahani

Waikawa Mipatsieta. Mipai tiuyurieka pitatsi'utixinaxi taheyemeki temixixininiki.

13 Meripaiti tsipuri tuurutsixi waxuriyaki, tsikeru mumierie mutataiyarie naxiyari kwamariyari, mikiki mepiki'iyariwakai teiteri, kemi'ane mika'itiya, mikiki mepipatsiekai, yuwaiyaritsie memi'itiatikaniki.

14 Merikitsi xika mipai 'anekaitini, matsi waikawameki katati'itieni Kiritsitu xuriyaya, miki mawari 'aixia mi'ane kanayuyeitiani mixatianiki Kakaiyari, 'Iyari yuheyemeki 'amuyeika mipai tipitiakaku, miki xuriyaya katani'itieka ta'iyari mikatatsi'utate'aniki kemitatiutate'akai kepauka mipai temiteyuriekai kimana temitekwinekekai, te'u'itiyaka, Kakaiyari mayenieretsie mieme tete'uximayati tepaki.

15 'Ayumieme miki kanihikitini kemi'ane mi'atia tiratu hekwame, miki memuta'inierie meheixeyati memakineki tita yuheyemeki wahetsie mitinake kememite'utahiawarie, mipai katiniuyurieni kepauka mumi, piwarunanai miwaxinaki teiteri memititsanaxiki 'iniari mexi 'a'uwekai meripai mieme tiratu.

16 Tewi xika tiratu 'utawewieni yupiinite hepaitsita, keyupaime me mitiwamini kepauka muminitisie, kaneuyeweka mihekiareki kename 'umi, 'arikeke kanitseirimiki miki tiratuya.

17 Tiratu mipai mi'ane 'aixia miyini, peuyewetse tewi miminiki meri, miki niukieya 'atsipikayiwe mexi 'akuxi 'ayeniere kemi'ane mitawewi.

18 'Atsita miki tiratu meripai mieme kepauka mutawewiya, xuriya putayeuria.

19 Muiṭsexi 'ana katiniwarutaxatiani yunaime teiteri naime 'aitsika kemitiu'aitsie 'iniari niukiyariki, 'arike tsikerutsixi tsipuri waxuriya haa kaniuniitiani, hitsupu xawari 'anahiaka wita mitairaiyeki, miki xuriyaki kaniwaru'iya teiteri yunaime, meta 'iniari niukiyari xapayari,

20 mipai 'utaiti: «'Iki xuriya tiratu 'iniariyari kanihikitini, kemitixe'utawewiri Kakaiyari».

21 Yaxeikia xuriyaki 'ixuriki tukiyari kaniu'iya, xakirite meta naime, mikitsie mitiutimawariwa.

22 'Iniari niukiyari kemaine, naiti xuriyaki katiniti'itiwani, xika xuriya katayeuriweni pikareuyehiwiarieni.

23 Merikitsi, kaneuyewekakaitini mi'itiyaniki tita miti'ikitsika, mi'ikeki tita taheima mitimieme, peru tita taheima mitimieme, miki mawari matsi yemeki 'aixia mi'aneki kaniu'itiyani pita.

24 Kiritsitu Tuki Mipatsieta pikaheutaha mamaki miwewiyata, yuri tuki 'ikiyarita, miki 'ikitsikayarita pikaheutaha, matsi muyuawitsie miemeta pita kaneutahani, hiki Kakaiyari hixie kaniuyeikani, tahetsiemieme mitaniuniki.

25 Miki meta, kepauka mana meutaha miixa mawari 'ayuyeitiwati pikayianekai, mawari wewiwamete tiwa'aitiwame kemireutahake Tuki Waikawa Muyepatsieta xeiwiari 'anuyeyeikakaku, xeime xuriyaya 'a'iti.

26 Xika 'aku mipai 'anenike, miixa piminikeyu kwie munetiarietsie paiti. Hiki matsi xeimieme xeikia matsiikiti kanayani tukari taxiximekaku, mitayeitianiki tita 'axamiti'ane, mawari mayuyeitiaki.

27 Teiteri wahetsie katininakimiki

xeimieme memikwiniki, 'ariketa 'itsikame kaniwatahiawimiki.

²⁸ Yaxeikiata Kirititsu mekanixeyiakuni miki memikwewie, kaniwatawikweitsitiamiki. Kemi'ane xeimieme mawari mayeitiarie hetsiena mitiuhiiwaniki tita 'axamemite'uyuri yuwaikawati, miki 'arike mekanixeyiakuni tita 'axamiti'ane kaxuawekaku.

10

Kirititsu kemtitayeitia tita 'axamiti'ane, mawari mayuyeitiaki

¹ Miki 'iniari niukiyaritsie kanimatsiikini tita 'aixia ti'aneti 'umiramie, peru 'etiriyari hepai katinimatsiikini xeikia, yemeki hepaina pika'ane ke'aixia mi'ane. Miki mawari yuheyemeki mukuxatariwa xeiwiari 'anuyeyeikakaku, miki hatsuaku pikayiwe miwaraye'atianiki miki 'ahurawa memakika.

² Mexika waraye'atianike, ¿mekatehayewakeyu memitemawatiwekai? Wa'iyari puwarutate'anikeyu tita 'axamemite'uyuri hepaitsita, xika xeimieme me'u'itiyanike miki miya memite'ayexeiya.

³ Matsi miki mawariki xexuime wiyaritsie mepaye'eritariwa 'axamemite'uyuriki.

⁴ Tuurutsixi meta tsipuri waxuriya pikayiwe tewi tita 'axamitiuyuri menuyeitirieniki.

⁵ 'Ayumieme kepauka kwiepa munuanikekai mipai kaniutayini:

«Mawari pepikanaki'erie kepemitixatarie,
matsi, pepinetsi'ukuha'aritari newaiyari.

⁶ Mawari taiyariyariki pepikanaki'a,

meta mawari menuyeitianiki tita tewi
'axamitiuyuri, miki pikamatsinake.

⁷ 'Ana mipai neputayi: «Kamitsi ne
—kemire'uxa xapa mikwikwiyaitsie
nehepaitsita—.

Nekaninuani yanemitiyurieneniki kemimatinake
'eki Kakaiyari».

⁸ Merikitsi matari mipai paine: «Mawari meta
'imikieri pepikanaki'erie kepemitixatiae,
mawari taiyariyari, meta mawari tita tewi
'axamitiuyuri miranuyeitiani, mawari mixatiae
kemaine 'iniari, mikiki pepikanaki'a».

⁹ 'Ana kwitita mipai kaniutayini: «Kamitsi
ne nekaninuani yanemitiyurieneniki
kemimatinake». Kanitayeitiani matari mieme,
mitatseiriyaki hutarieka mieme.

¹⁰ Mipai mitinakeki, 'ayumieme tepupatsie tame,
mawari mayeitiarieki xeimieme Ketsutsi Kiritsitu
yuwaiyarisie 'uyeikati.

¹¹ Yunaiti mawari wewiwamete tukariki
mana mekaniuti'uka mete'uximayati, mawari
yaxeikia 'aneme me'ixatiati, miki mawari
hatsuaku mikayiwe mitatsi'anuyeitirieniki tita
'axatemite'uyuri.

¹² Peru Kiritsitu, mawari 'uwewieka xeimieme
mita'anuyeitirieniki tita 'axatemite'uyuri,
mawarieya yuheyemeki 'aixia miyuriki,
'ayumieme miki Kakaiyari tserieta kanayerini.

¹³ Hiki xeikari pita'ikwewa mexi
me'a'iwariexime miki memeye'unie, mexi
me'ahapawa hixiena.

14 Xeimieme mawari mayeitiarieki, yuheyemeki piwaraye'atia miki memikupatsiwa yux-exuiti.

15 'Iyari Mitiyupata pitatsihekia tia yaxeikia 'utaiti. Mipai kanaineni:

16 «Tiratu mipai 'aneme nekaniwatawewiriemiki, miki tukari 'aye'ayu 'arike —mipai paineta Ti'aitame—:

Ne'iniari niukiyari wa'iyaritsie nepiwapitiani, meta wa'eriwametsie nepita'utiani».

17 Mipaitatsiere paine:

«'Axakememite'uyuri, 'Iniari kememite'utitsanaxia, miki nepikara'eriwaniri».

18 Merikite miki hepaitisita xika reuyehiwiyarieni, tawari mawari pikaxatarieni, menuyeitianiki tita 'axamitiuyuri.

'Ahurawa teke'akikani

19 'Ayumieme nepaine ne'iwama, Ketsutsi xuriyaya mutaxiriyaki, heitserie tepexeiya tekamamati temeutahakeniki Waikawa Muyepatsieta.

20 Huye hikike mimieme mikiki temayeneniereniki, miki tekanexeiyani, miki mutahuyetaxiki tahetsiemieme, kemu'itiarie yuwaiyaritsie, tahuye patia, temeutahakeniki tame hakewa mireunamekai miki 'ixurikiki.

21 Miki meta, tekaneixeiyani mawari wewiwame mitirikaiye Kakaiyari kiiya mihiritiarie.

22 Merikitsi mipai mi'aneki 'ahurawa teke'akikani, ta'iyari yemeki yuxewikaku, yemeki yuri tete'eriet, ta'iyari 'itiyakaku 'axatekateyuriet kapa ta'iyari tatsi'utatieniki

tita 'axatemite'uyuri hepaitsita, tawaiyari meta hauxinariiekaku haa 'aixia mi'aneki.

²³ Yateketekahuni, mipai tetetahekiatati ketemite'ikwewie tekatehayewati, mipai tetemaiti, kemi'ane mipai mitatiutahiawixi tita mitatimini, miki yakatinikamieni kemaine.

²⁴ Tekehetata'eritiwani tanaiti, temitawairiyani temitetakanaki'eriekaki 'aixia temiteyuriekaki.

²⁵ Tepikatehayewani tepitakuxexeiriwani, hipame wahepai tepikatehayewani, tepitatuikani matsi, kexemite'imate miki tukari maye'aximeki.

²⁶ Ta'iyari ya'anekaku xika tetawairiyani 'axatemiteyuriekaki teheitimaime tita yuri miraine, mawari pikaxuawe tawari menuyeitianiki tita 'axatemite'uyuri.

²⁷ Xikari mipai 'aneni temamati tepita'ikwewa temita'iwawiyarieniki xeikia, yuhaxiaki kepauka miwataxitsitiani miki memeye'unie, yumexiitiatitai.

²⁸ Xika 'itixani'erieni 'iniari niukiyari Mui-sexi mi'atia, mekanitakwikwiwakaitini mekanen-imayatsieti, yuhutati yatini yuhaikati mipai metetahekiatayu.

²⁹ ¿Kexeteku'eriwa, matsi yemeki hetsiena katinake mu'uximatiarieniki, kemi'ane Kakaiyari nu'aya minanaima, kemi'ane tsewiximariekame mi'erie miki xuriyaya tiratu mutatseiriyarie kimana, mipatsie kimana, kemi'ane mitawe'erie 'Iyari 'aixia mitatipitia?

³⁰ Tame tepimate kemi'ane mipai mutayi: «Nekimana nepinemieneni, 'anepirapika ne», tawari mipai putayi: «Ti'aitame yuteiterima

pɪwa'uximatiani».

³¹ Pɪmariweni kepauka Kakaiyari mayeniere miwiyani.

³² Xekena'eriwani matsi meripai kemitiuyi, 'ana kwiti xe'uhekariyarieka, kwinimieme xepite'ukakukuinekai peru xepitenewiekai.

³³ Tsepa yunaime wahixie xemitewiniariekai 'axaxetekihawariwati xe'uximatarieti, tsepata hipame xemiwaparewiekai kepauka mipai memu'itiarie, xeme xepitenewiekai.

³⁴ Memanutaxiriyakai kememite'ukwinitiarie, xemeta wahepai xepiteyumaikai. Xeyutemamawiet i xepiwanewiekai kepauka memixete'unawairi xepiinite, mipai xetemaiti, yupiinite matsi 'aixia miti'anene 'emititeriwe xemitehexeiyaki xeme muyuawitsie.

³⁵ 'Ayumieme nepaine, xepikaheiwiiwani tita xemitehexeiya, heitserie xepexiya xekamamati xemiyaikaki, mikiki waikawa xepite'iwa.

³⁶ Kaneuyeweka xemite'ukanenewiekaki, xehexeiyati xemakineki kexemite'utahawarie ke-name mipai tixepitiani, yaxeteyurieyu kemitinake Kakaiyari.

³⁷ 'Etsiwa yareutewikaku 'akuxi, «kemi'ane 'umamie kaninuamiki, 'epikareutere.

³⁸ Miki heitserie mexeiya nehetsia miemetiti miki kanayenierkamiki yuri miti'erieki.

Xika wairipieka,

ne'iyaritsie nepikanaki'aka kenemitixeiya».

³⁹ Peru tame mipai tepika'anene, tepikawairipietika, tepikatatimaiyarieni, matsi yuri tepite'erie tatukari temikatatimaiyaki.

11

Kemi'ane yuri miti'erie

¹ Kemi'ane yuri miti'erie mipai pitimate, peix-eiyani tita mitikwewie, mipaita katiniyumaika, 'apuwe tita mikatixeyariewe.

² Mipai yuri memite'eriekaiki mekanimari-wakaitini tatutsima meripaiti miemete 'aixia memiteyuriekaiki.

³ Yuri temite'erieki mipai tepitemate, kwie munetiarieki Kakaiyari mipai 'utayiku. Tita mitixeyariewe kemitiuwewiya, tita mikarahekiaki katiniutiwewiyani.

⁴ Yuri miti'eriekaiki 'Aweri mawari 'aixia mi'ane Kakaiyari puxatia, Kaini mawarieya 'aixia ka'anekaku hepaina, mipai mitiutimawaxiki putahekiatsie kename heitserie hexeyakai, Kakaiyari mipai tihekiatakaku 'imikierieya hepaitsita. 'Ayumieme tsepa mimiki, 'iniarieya pitikuxata 'akuxi.

⁵ Yuri miti'eriekaiki, 'Enuki pewitikie miki mika'ayaniki, pumawekai Kakaiyari heiwitiku. Kahewitikieweti 'akuxi, mipai pitihekiatsiekai Kakaiyari minaki'aritiakaiki.

⁶ Tewi yuri xika kati'erieka, pikayiwe minaki'aritianiki, kaneuyeweka mipai yuri miti'eriekaki kemi'ane Kakaiyari 'aurie maye'amiki, kename 'a'uyeika, kename tiwa'iwitsitia miki memikuwautiwe.

⁷ Yuri miti'eriekaiki, Nuhexi yukweriwayurieti, kanuwa kaniutawewieni miwatawikweitsitianiki yukie kiekatari, mipai tiutahawarieka tita teiteri 'akuxi memikatexeyawawekai hepaitsita. Mipai mitiuyuriki, kwiepa memitama wahetsie

pitiuhiiya, mikitsie pita pitiunakixi heitserie mexeianiki yuri ti'eriet.

8 Yuri miti'eriekaiki, 'Apirahami kepauka muta'inierie, yatikamiet mana paiti kaneyani hakewa hetsiena mirenakenikekai, kaneyani 'atsikatimaiti hakewa menuanikekai.

9 Yuri ti'eriet mana kaniuyupata miki kwieyaritsie paiti kemitiutahawarie hetsiena mitinakenikekaiki, peru xeime kwieya hepai pitimaikai. 'Ixuriki kiiyarita mekanayetekaitini miki 'Itsahaki hamatia meta Kakuwu hamatia, mikita wahetsie mitinakenikekai kememite'utahawarie, yaxeikia 'Apirahami hepai.

10 Kiekari kanikwewiekaitini miki kii hetia mieme tenari mitse'i mexeiya, Kakaiyari kii 'iniinatame meta 'iwewiwame mihiki.

11 'Apirahami yuri miti'eriekaikita, Tsara hamatia tirikariya mepupitiarie nunutsi mehexeiyati memakineki, tsepa tukarieya manutitia tsepa mi'ukaratsitikai, mipai pitiuyi yatikamiekame mi'eriekaiki kemi'ane mipai mititahawixi kename mipai tipitianikekai.

12 'Ayumieme xeimetsie xeikia mekaniyekine, tsepa miki mumiximekai, taheima miemete xurawetsixi wahapai meyupaimeti mekanakine, meta xiekari haramara tetsita mieme hepai meyupaimeti mekanakine mikayu'iniatsinia hepai.

13 Yuri mete'eriet mekaneutakwixiani miki yunaiti, meheixeyati mepika'aki kememite'utahawariekai, matsi 'ateewa paiti mepixei yuri mete'eriet, mepitawairitia, mipai mepiteyuhekiatakai kename xaitsie miemete

kikamete mehikitikai xeikia 'ena kwiepa me'u'uwati.

¹⁴ Mipai me'utiyuati, miki piyuhekiata kename kwie mekuwautiwekai.

¹⁵ Xika me'iku'eriwanike miki kwie hakewa memeyekitsie, mepiyiwawenikekai memikunuaxianiki mana.

¹⁶ Matsi mepihiwe'eriekai kwie 'aixia mi'ane taheima mieme. Kakaiyari 'ayumieme pikayutewiya miki wakakaiyari miramamatiwaniki, kiekari puwarukuha'aritsitiri.

¹⁷ Yuri miti'eriekaiki 'Apirahami kepauka muta'iniatsie, 'Itsahaki mawari payeitia tima, kemi'ane mipai mitiutahiawarie kemirexeiyanikekaiki, miki mawari peyeitianikekai yuniwe muyuxewikai.

¹⁸ 'Apirahami mipai tsepa mitiutahiawariekai meripaiti: «'Itsahaki xiiyarimama mepite'uteriwariwani miki 'ahetsie memiyekine».

¹⁹ 'Apirahami mipai katiniyikihawekaitini, Kakaiyari miyiwekaiki tawari menukuketianiki mikite watsata, 'ayumieme hutarieka heixeiyati kemiratia, 'inari kanayani.

²⁰ Yuri miti'eriekaiki 'Itsahaki 'aixia kaniutayini Kakuwu meta 'Etsahu wahepaitsita, 'aixia memi'itarieniki tita 'umiramiekaiki wahetsiemime.

²¹ Yuri miti'eriekaiki Kakuwu kepauka mimiximekai 'aixia kaniutayini yuxexuime Kutse niwemama wahepaitsita, miki 'aixia memi'itarieniki, puyutanenewi yutuikati yu'itsiki.

22 Yuri miti'eriekaiki Kutse miximeti mipai putayi 'Ekipitu kwieyaritsie memiyekinekekaiki 'Ixaheri xiiyarimama, puyuta'aitaxi 'umeteya manutikieniki.

23 'Utinuiwaku Muitsexi yuri memite'eriekaiki paapaya mekaniti'awieta haika metseriyari nunutsi witsimemite'ixeyakaiki, mepika'utimama kwiepa ti'aitame kemitiuta'aitakai.

24 Yuri miti'eriekaiki Muitsexi 'e'utewiti, miki kwiepa ti'aitame tewarieya mitiuteriwariwani pika'inakirixi, pika'uyuwaari Parahuni niweya nu'aya mixatsiwaniki.

25 Puyuwari matsi 'axami'itiarieniki Kakaiyari teiterimama wahamatia, kayuwariyati minaki'akaki 'axatiyurieneti yapaimexia wiyari.

26 He'eriwati tita mira'iwakekai xeikia, mipai pitiku'eriwakai, kename matsi waikawa rexeiyanikekai 'axatikihawariwati Kiritsitu hepai, kenameta tixaiti karexeiyanikekai piinite xika rexeiyanike 'Ekipitutsie timieme waikawa.

27 Yuri miti'eriekaiki 'Ekipitu kwieyaritsie kaneyeyani ka'imakati kwiepa ti'aitame tsepa miha'akai. Pitiukanewiekai, kemi'ane Kakaiyari mixeiya hepai piyianekai, tsepa miki mikaxeiyariewe hatsuaku.

28 Yuri miti'eriekaiki Patsikwa 'ixiarariyari put-sutia meta kitenie pu'iyaxia xuriyaki, kemi'ane wamatiarima miwaka'unakai mikawamayianiki 'Ixaheritsixi wamatiarima.

29 Yuri memite'eriekaiki Haramara Mixetatsie mekananukine makuwaki hepai 'anekaku, peru

'ekipitutari mipaita meyinike mekanehauxiani haramaratsie.

³⁰ Yuri memite'eriekaiki, kerikutari watetsariya kananaka'une 'atahutamexia 'auriena me'akineku.

³¹ Yuri miti'eriekaiki Xahawi pika'utatimaiyarie teiteri yuri memikate'eriekai wahamatia, miki 'uka tuminiki miyuwitiniakai kanihikitikaitini, kuyaxi 'awie nenieremete yukiita 'aixia 'anemeki muwarutanaki'eriki.

³² Merikite, ztita 'akuxi netitaxata? Kerehuni, Waraki, Tsanitsuni, Ketexi, Rawiri, Tsamuheri, meta Kakaiyari niukametemama yunaime xika miki newarutaxata, tukari peuyewekayeyu ne-hetsiemieme.

³³ Miki yuri memite'eriekaiki mepiwara'iwaxi kwiepa te'aitamete, heitseriemeki mepite'aitakai, meheixeyati mepaki kememite'utahawarie, mekaniwaruta'imaiya mayetsi memikawatikwaniki,

³⁴ mekanitini tai tsepa mitirikaiyekai, mekaniutawikweni kutsiraki memikakwi'iwaki, tsepa memuwerranikai meputirikariyarie, kuyaki memiyiwawe mekanakine, mekaniwaranukuweiya kuyaxi xaitsie miemete.

³⁵ 'Ukari tawari mekaniwarutanaki'erieniyuhetsia miemete, me'ukwiku me'anuku'uku.

Hipati mekanitiweiwakaitini mekayuwairiyati memixinarieniki, mipai mepiteyuriekai memipitarieniki matsi 'aixia 'anemeki memanuku'uniki.

³⁶ Hipatita kememite'upitairie, mekani-nanaimariekaitini mekanitiweiwakaitini, meta mepitihiiwakai mepanutaxiriyakai.

37 Mepitituaxiwakai tetexiki, tsexutsuki mepitixitewakai, mepi'iniatsietiwakai, mepikwi'iwakai kutsiraki, mekaniku'uwakaitini muxa nawiyari meta tsipu nawiyari me'anakatitikaiti me'ikuteixitiweti, mete-heuyehiati, me'uximatiarieti, 'axame'itiiarietiweti.

38 Kwiepa memitama 'aixia mepikate'u'iyarikai watsata memixuaweniki teiteri miya memi'anenekai. Makumawetsie, hiritisie, mekaniku'uwakaitini meheuyexirieti, terita meta meukatewatsie meyetetikaiti.

39 Miki yunaiti tsepa memihekiatsiekai yuri memite'eriekaiki, 'akuxi tita memite'utaxatiarie metehexeyati mepika'aki.

40 Kakaiyari meripaiti tixaiti pitiutawewi matsi 'aixia miti'ane tahetsiemieme, miki memaye'axianiki 'ate'u'uwakaku tame xeikia.

12

Ketsutsi xeikia tepa'eriwani

1 'Ayumieme, tameta hiki ta'aurie meyuxeiriekaku tehekiatamete meyuwaikawati, tepeihiani naime mirahete, naime 'axamiti'ane mitatsikuhapana. Tekawairipietikaiti tepuhuni, tepitanautsaxiani temeta'axianiki hakewa temekwewiya,

2 kwinimieme Ketsutsi teha'eriwati, kemi'ane mitsutia meta meye'atia titatsie yuri temite'erie. Miki mipai ra'eriwati kemitiyutemawiekakekai 'arikeke, kuruxi punewi tsepa mutewiniarie. Hiki mana kanakani Kakaiyari 'uwenieya tserieta.

3 Xekena'eriwani miki kemitiukanewiekai 'ax-ateyuruwamete kwinimieme meheye'uniekaku.

Kapa xe'u'uxeniki xeme, yu'iyaritsie kapa xewairipiekaki.

⁴ Xeme kexemiteyukwitiwe tita 'axamiti'ane hamatia, 'akuxi xexuriya pika'uhane.

⁵ Xiari xepetimai kemitixetuika tewi yuniwe mitikuxaxatiwa hepai, mipai 'utaiti:

«Neuxei neniwe, pepikatiukatawe'erieka ti'aitame mati'ikitiakaku kwinimieme 'uximatiarikaki, pepikawairipieka miki matsi'utate'akaku.

⁶ Ti'aitame 'uximatiarikaki piti'ikitia kemi'ane minaki'erie, yunaime piwakuwaya yuniwema miwarutanaki'eri».

⁷ Kepauka xemite'uka'eniwa, xete'ikitiarieti xemakineki 'uximatiarikaki xepiyia, Kakaiyari pixeyuriene kemipayurie yuniwema. ¿Kepaiki raniwetikaku, miki paapaya pikati'ikitia 'uximatiarikaki?

⁸ Mexika 'uximatiarikaki xekate'uta'ikitiarieni yunaiti 'axeikia kememitepitarietie, kari 'awienuari xepiniwemama, Kakaiyari xepikaniwemama.

⁹ Miki meta, tepiwarexeiyakai tapaapama memiteiteritikai, miki metate'ikitiakaku 'uximatiarikaki tepiwareu'eniekai. Hiki matsi yemeki peuyewetse temi'enieka 'iyarite wa'ukiyari para temayeneniereniki.

¹⁰ Miki yapaimexia tukari mepitate'ikitiakai kemitiwanakekai 'uximatiarikaki, matsi Kakaiyari 'aixia temi'itiariekaki pitati'ikitia 'uximatiarikaki, hepaina tepatsietie temakineki.

¹¹ 'Uximatiarikaki mexi tete'ikitiarie, tetatemamawiekame tepikata'erie, matsi tetahiweriekame tepita'erie, 'arikeke

miki mipai memi'itiarie mekanipitiarieka heitseriemeki yamemitekahuniki, yu'iyaritsie meka'uximatiarieti.

¹² 'Ayumieme yumamá xekeneutseiriyaxia miweraraniki, yutunuteta mikatirikawiki xekeneutitseiriya mititirikaxianiki.

¹³ «Huye mixexeurawi xekeneutiwewi yi'ikatsie mieme,» mi'ikatuni mikahekawaitseniki meta mikatikukukuineniki.

¹⁴ 'Aixia xemitewaxeiyaniki yunaime xekeneyumexiitiaka, meta xemipatsiekaki Kakaiyari hetsiemiemeki. Xika mipai katipatsieka, hatsuaku Ti'aitame pika'uxeiya.

¹⁵ Xekeneyi'iwiyani xewiti ka'aye'aweti mika'ayaniki, Kakaiyari 'aixia tiuka'iyariti kemitiminikeyu, xekeneyi'iwiyani xewiti kapa xemuinaneniki, nana kwiepa mutineika hatsiwimeki mutixuxuawere hepai yianeti, mipai xika tiyurieneni, yumiireti mekanitsewixi-mariekakuni.

¹⁶ Xekeneyi'iwiyani kapa xewiti 'ikumaíwaniki kemi'ane mikayi'iya meta mikayikina, kapa Kakaiyari ka'ayexeiyati yianeniki 'Etsahu hepai, miki xei'ikwaiyariki kanipata heitserie mexeiyakaiki mimatiaritikaiki.

¹⁷ Mipai xepitemate, 'arike kepauka heixeiyati mayeimikikai tita hetsiena mitiutaxatsie 'aixia mi'itiarieniki, pixani'eriwakai. Mipai pikatiupitiarie muyupataniki tawari, tsepa 'utatsuati mipai mitiwaukai.

¹⁸ Hakewa xeme'axia xeme, mana xepika'u'axia meripaiti miemetexi wahepai hakewa tewi

mīyīwe mimayianiki yemuri, hakewa tai mita'a, hakewa meyiwi, teika hakewa meyeika,

¹⁹ kuxineta hakewa mehītsierie, hakewa xewiti me'enierie 'utaniukakaku, miki kepauka memi'eni mepitawawiri tawari xeime niukiki memikatahiawarieniki.

²⁰ Mepika'ikemakai tita memite'uta'aitiarie mipai metekihawariwati: «Tsepa yeutanaka mimayia yemuri, tetexiki pimierieni tituaxiwati».

²¹ Yemeki mariweti mitiyuxexeiyakaiki, 'atsita Muitsexi mipai kaniutayini: «Ne marikaki nepuyiyiaka».

²² Xeme matsi xepu'axia Tsiyuni yemuriyari hakewa mewe, Kakaiyari mayeniere kiekariena, Kerutsareme taheima mieme hakewa maniere, yumiireme wahetsia xepu'axia, taheima miemete niuki tuayamete wa'ixiararipa,

²³ mana matiarixi memutinunuiwa muyuawit-sie memaka'utiarie hakewa memeyutixexeiriwa, mana xepu'axia. Kemi'ane 'itsikametiti yunaimemiwata'iwawiya Kakaiyarititi, miki hetsia xekaniu'axiani, miki heitseriemeki yamemitekahukai memaye'axiawawe yu'iyaritsie memu'uwa, miki wahetsia xekaniu'axiani,

²⁴ kemi'ane tiratu hekwame mi'atia Ketsutsititi, miki hetsia xekaniu'axiani, hakewa xuriyaki mire'iyarie kimana tewi mi'itixiani mana xekaniu'axiani. Miki xuriya matsi 'aixia 'anemeki katihekiatani, 'Aweri xuriyaya hepaina katihekiatakaku.

²⁵ Xekeneyukweriwayurieka xemika'ixani'eriekaki kemi'ane maniuka. Miki mepika'utawikwei me'itixani'erieka

kemi'ane 'ena kwiepa mipai mitiwarutahiawixi kememi'itiarienikekai, tame matsi yemeki tepikatawikweni xika ta'aurie te'axirieni temika'i'enieniki kemi'ane taheima maniuka.

²⁶ Miki 'utaniukakaku 'ana kwie kaniutayuan, hikita kemitiyurieni mipai paine ya'utaiti: «Xeimieme 'akuxi kwie hikiame nepikatayuitiani, matsi muyuawita nepitayuitiani naime».

²⁷ «Xeimieme 'akuxi» 'utaiti, mipai pitihekiata, tita mititayuitiariewe pititayeitiarieni, tita mitiutiwewiya xatati, peru pitiyuhayewa tita mikatitayuitiarieni.

²⁸ 'Ayumieme pamipariyutsi teke'ipitiaka mikatayuitiarieni tati'aitiwame temupitiarieki, hakewa mire'aia miki, mana pikatayuitiarieni, mipai tekete'uximayaka Kakaiyari hetsiemieme pamipariyutsi te'ipitiati. 'Aixia 'anemeki kemitinake, teheyexeyati meta teheyemakati.

²⁹ Metsi «Takakaiyari tai naime mititixitsitiwa hepai kani'aneni».

13

Kemireuyewetse yamitiyurieneniki Kiritsitu hetsie tiwiya

¹ Xepikatehayewani xewanaki'erieteti 'iwamarixi.

² Xepikatehatitimaiyani xemiwatanaki'erieniki 'atewa kiekatari, mipai meteyurieteti hipati mepiwarutanaki'eri niuki tuayamete 'atsimekatemaiti.

³ Xekeniwara'eriwani kemi'ane memanuta-xiriya, wahamatia xemanutaxiriya hepai xeteyumaiti, xekeniwara'eriwani miki

'axamemi'itiarietiwe mipai xetemaiti, xemeta yuwaiyaritsie wahepai xemi'itiarietiweni hepai.

⁴ Teiteri xika meneneikeni, 'aixia meketex-eiyarieka naime hepaitsita, peru yi'iya meta yikina hamatia xeikia mepiyukumaiwani, metsi, Kakaiyari 'uximatiarika kaniwapitiamiki miki memikumaiwa kemi'ane mikawa'iya meta mikawakina.

⁵ Mipai xeketeneu'uwani tumini xekahiwe'eriet, xekenenaki'aka xeheixeyati tita xemitehexeiya. Miki kanihikitini kemi'ane mipai mutayi:

«Ne yemeki 'axaitame nepikamatsihayewani,
nepikamatsiku'erien hatsuaku».

⁶ 'Ayumieme tekamamati mipai teputiyuane:

«Ti'aitame kanihikitini kemi'ane minetsiparewie,
nepikamaka.

¿Kekuta netsi'uyuriwe tewi?»

⁷ Xekeniwara'eriwati miki memanuyetekai, kememi'anenekai, Kakaiyari niukieyaki mepitexe'utaxatia. Xewara'eriwati mipai kememite'u'uwakai, xekeniwa'ikeni yuri kememite'eriekai.

⁸ Ketsutsi Kiritsitu meripaiti hikita yaxeikia kani'aneni, tsepaneti xeitsienitu wiyari manuyekika.

⁹ Xepikayuwairiyani xemeuyexiriyani, 'ikitsika yiki 'aneneme xepika'enietiweni hipame wayeyaritsie mieme. 'Aixia kaniyimiki yu'iyaritsie mitseiriyarieniki 'iya 'aixia tiuka'iyarikaku, peru 'ikwaiki hatsuaku pikatseiriyarieni, miki 'ikwaitsie metewiyati memu'uwa hawaiki mepika'uparewiya.

10 Tame mawari taiyame tekanexeiyani, mana mieme memitekwaakaki heitserie mepikahexeiya miki mawari wewiwamete 'ixuriki tukiyarita memite'uximayatamete.

11 Mawari wewiwamete tiwa'aitiwame Waikawa Muyepatsieta kepauka mi'atiwa watewama waxuriya 'aixia miyurieniki tita 'axamemite'uyuri, wakaxarite kiekari tetsita pititaiyariwa.

12 'Ayumiemeta Ketsutsi kitenie 'aurie pitukwinixi takwa, Kakaiyari hetsiemieme miwapataniki teiteri yuxuriyaki.

13 Hikimi hetsiana tepiyehu kiekari tetsita paiti, niukimarika tenewieti hepaina.

14 'Ena kwiepa tepikaheixeiya kiekari 'amititeriwe. Tepitakwewie pita kiekari xewiti 'umamie.

15 'Ayumieme miki tatsiparewiekaku, tamawari teke'iwewirieka Kakaiyari taheyemeki, 'aixia te'utiyuati hepaitsitana, tateta mayeneikaki teketahekiatani hetsiana temiemetiti kemi'ane mihiki, miki kanihikitini tamawari.

16 Miki meta, xepikatehatitimaianyani 'aixia xemiteyuriekaki xemiteyumikwaniki, mawari mipai mi'ane pinake Kakaiyari.

17 Yaxeketenekahuni kememutiyuane miki memitexe'aitia, xewa'enieti. Miki mepi'iwia xe'iyari mipai metemaiti, yihiritiarika hepaitsita memita'iwawiyarieniki. Mipai xeketeniwa'enieka, miki mipai memite'uximayakaki meyutemamawieti, me'uti'aiwati memikayiakaki, mexika xewahiweritiaka, xeme matsi xepikaparewiyani.

18 Tahetsiemieme xekeneyunenewieka, tame mipai tepitetamate, ta'iyari 'aixia pi'ane 'atsipikahaine, naimeki temitawairiyaki 'aixia 'anemeki temeu'uaniki.

19 Nepixetuika mipai xemiteyuriekaki matsi yemeki, kwitiwa xemipitiarieniki tahixie temuti-neniereki.

20 Kemi'ane Kakaiyarititi mitatsipitia ta'iyaritsie temika'uximatariiekaki, kemi'ane mikite watsata menayewiti muxatsi wahiweme mimariwe Tati'aiiwame Ketsutsi, miki 'itatseiriyaka tiratu yuheyemeki 'amuwe miki xuriyayaki,

21 miki xika xe'aye'atiani kemitinake yaxemiteyuriekaki naimeki 'aixia xeteyurieti, miki xika xe'uyuitiani xeminaki'aritianiki kemitixexeiya, Ketsutsi Kiritsitu xeparewiekaku. Miki hepaitsita 'aixia ketikuxaxatsiwani yuheyemeki. Mipai xeikia kani'aneni.

22 Ne'iwama nepixetuika, xekeneuyuwairiya xemi'enieniki neniuki kenemitixetuika, yapaimemeki nepitixe'uta'utiiri.

23 Mipai xeketenemaika, ta'iwa Timuteu 'anutahiyyaka muxinarieki. Kwitiwa xika nuani tepixexeiyayu tanaiti.

24 Xekeniwawairitiaka yunaime memitexe'aitia, yunaime Kakaiyari teiterimama. 'Itariya kwieyaritsie miemete mepixewairitia.

25 'Aixia ketiuka'iyarini yunaime xehet-siemieme. Mipai xeikia.

**KAKAFYARI NIUKIEYA XAPAYARI
WIXARIKAKI**

**The Holy Bible in the in Huichol language of Mexico,
2020 edition**

**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3